

Na osnovu člana 16. stav 4. Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za boračka pitanja, Vlada Zeničko-dobojskog kantona, na 133. sjednici, održanoj 19.06.2026. godine, d o n o s i

ZAKLJUČAK

I.

Usvaja se Informacija o stambenom zbrinjavanju branilaca i članova njihovih porodica u 2025. godini, Ministarstva za boračka pitanja, broj: 13/04-2-1-37-11109/26 od 05.06.2026. godine, koja čini sastavni dio ovog zaključka.

II.

Zaključak stupa na snagu danom donošenja.

Broj: 02-_____/26
Datum, 19.06.2026. godine
Zenica

PREMIJER

Nezir Pivić

DOSTAVLJENO:

1x Ministarstvo za boračka pitanja,
1x a/a.

**BOSNA I HERCEGOVINA
FEDERACIJA BOSNA I HERCEGOVINA
ZENIČKO-DOBOJSKI KANTON
MINISTARSTVO ZA BORAČKA PITANJA**

I N F O R M A C I J A

**o stambenom zbrinjavanju branilaca i članova njihovih porodica
u 2025. godini**

Zenica, juni 2026. godine

I. Uvod

Neriješeno stambeno pitanje predstavlja jedan od najozbiljnijih egzistencijalnih izazova stanovništva Zeničko-dobojskog kantona, pri čemu su posebno ugroženi branioci i članovi njihovih porodica. Riječ je o izrazito osjetljivoj kategoriji stanovništva, koju, između ostalog, čine članovi porodica poginulih branilaca koji žive u nepotpunim porodicama, ratni vojni invalidi, kao i demobilizirani branioci sa narušenim zdravstvenim stanjem. Ove kategorije, kao nosioci porodičnih obaveza, imaju trajnu potrebu za posebnim društvenim i institucionalnim tretmanom, naročito u oblasti zdravstvene zaštite, zapošljavanja, uslova rada, ali i u segmentu stambenog zbrinjavanja.

Polazeći od moralne i društvene obaveze države i šire društvene zajednice da osigura adekvatan socijalno-ekonomski status branilačke populacije, a imajući u vidu njihov nemjerljiv doprinos u odbrani zemlje tokom odbrambeno-oslobodilačkog rata, pomoć u obezbjeđivanju osnovnog egzistencijalnog prava, prava na dom, predstavlja jedan od prioriternih zadataka. Sa aspekta pripadnosti branilačkoj populaciji, radi se o prioriterno zaslužnoj, socijalno ranjivoj kategoriji stanovništva, kod koje je često prisutna umanjena radna sposobnost.

Rješavanje stambenog pitanja branilaca i članova njihovih porodica, u okviru pripadajućih dopunskih prava, provodi se kroz dodjelu jednokratnih, bespovratnih novčanih sredstava, s ciljem pružanja konkretne pomoći u rješavanju stambenog pitanja, odnosno unapređenja uslova i kvaliteta života ove kategorije stanovništva.

Imajući u vidu navedeno, rješavanje stambenog pitanja branilačke populacije predstavlja jedan od prioriteta u radu Ministarstva za boračka pitanja (u daljem tekstu: Ministarstvo), te je kao dopunsko pravo jasno definisano važećim propisima iz oblasti branilačko-invalidske zaštite na području Zeničko-dobojskog kantona (u daljem tekstu: Kanton).

II. Normativno regulisanje/ pravni osnov

Članom 29. Zakona o pravima branilaca i članova njihovih porodica ("Službene novine FBiH" broj: 33/04, 56/05, 70/07, 9/10, 90/17, 29/22, 60/24 i 6/26- u daljem tekstu: Federalni zakon) utvrđeno je da Kantoni svojim propisima osiguravaju prioriterno rješavanje stambenog pitanja pripadnika branilačke populacije i to prema pravu prvenstva kako slijedi:

1. djeca poginulih, umrlih, nestalih branilaca bez oba roditelja i ratni vojni invalidi sa oštećenjem organizma od 100% I grupe;
2. porodice sa dva i više poginulih, umrlih, nestalih branilaca i ratni vojni invalidi sa oštećenjem organizma od 100% II grupe;
3. porodice poginulih, umrlih, nestalih branilaca i ratni vojni invalidi sa oštećenjem organizma od 90%, 80% i 70%;
4. ostali ratni vojni invalidi.

Članom 4. tačka h) Zakona o pravima demobiliziranih branilaca i članova njihovih porodica („Službene novine FBiH“, broj: 54/19, 29/22, 81/23 i 60/24- u daljem tekstu: Zakon o pravima DB) utvrđeno je pravo na stambeno zbrinjavanje, a članom 32. stav (1) i (2) i (3) navedenog Zakona decidno je definisano slijedeće:

„ Demobilizirani branioci koji nemaju u vlasništvu stan ili kuću, niti koriste stan u svojstvu nosioca stanarskog prava mogu ostvariti pravo na pomoć u rješavanju stambenog pitanja u skladu sa kantonalnim propisima, a prema sredstavima kantona predviđenim za te namjene.“ -stav (1);

„Sredstva za ostvarivanje prava iz naprijed navedenog stava osiguravaju se u budžetu kantona u skladu sa mogućnostima.“- stav (2);

„ Sredstva za ostvarivanje prava iz naprijed navedenog stava za demobilizirane branioce nastanjene u Republici Srpskoj osiguravaju se u budžetu kantona na čijem području je povratnik u entitetu Republika Srpska imao posljednje boravište ili u budžetu kantona koji je najbliži mjestu prebivališta povratnika u skladu sa mogućnostima.- stav (3).

U cilju osiguranja provedbe odredbi Federalnog zakona, kao i Zakona o pravima DB na nivou Kantona, oblast stambenog zbrinjavanja branilaca i članova njihovih porodica uređuju:

- Zakon o dopunskim pravima branilaca i članova njihovih porodica ("Službene novine Zeničko-dobojskog kantona" broj: 15/24- u daljem tekstu: Zakon)- član 3. tačka k) Zakona predviđa pravo na stambeno zbrinjavanje kao jedno od dopunskih prava, a Poglavljem VII. Zakona regulisano je pravo na rješavanje stambenog pitanja koje ostvaruju branioci i članovi njihovih porodica na području Kantona, kao i prioriteta u rješavanju stambenog pitanja i
- Uredba o pomoći u rješavanju stambenog pitanja branilaca i članova njihovih porodica ("Službene novine Zeničko-dobojskog kantona" broj: 1/25- u daljem tekstu: Uredba), kao podzakonski akt.

Ističemo da je od 01.01.2025. godine počela primjena Uredbe, koja je donesena u cilju provedbe Zakona i usklađivanja sa federalnim propisima. U odnosu na raniju uredbu, nova Uredba donosi značajna unapređenja i proširenja prava, kako u pogledu korisnika, tako i u pogledu uslova, visine i vrsta pomoći, te pojednostavljenja procedura. Proširen je krug korisnika prava, tako da pravo na pomoć, pored branilaca, mogu ostvariti i određeni članovi porodica umrlih branilaca, kao i posebne kategorije korisnika–djeca šehida/poginulih, umrlih i nestalih branilaca, te djeca umrlih dobitnika ratnih priznanja i odlikovanja, bez ograničenja u pogledu godina starosti, nakon prestanka prava na porodičnu invalidninu. Olakšan je uslov u pogledu imovinskog cenzusa, na način da ukupna primanja domaćinstva mogu iznositi do dvije prosječne plaće u Federaciji BiH, umjesto ranije jedne prosječne plaće, čime je omogućeno većem broju potencijalnih korisnika da ostvare pravo. Nadalje, olakšan je uslov i u pogledu ranijih korisnika sredstava na način da se istima može odobriti ponovo pomoć za stambeno zbrinjavanje ukoliko nisu bili korisnici predmetnih sredstava u iznosu većem od 7.000,00 KM, a što je ranije iznosilo 5.000,00 KM. Značajno je povećan maksimalni iznos pomoći po pojedinačnom zahtjevu, i to do 50.000,00 KM, u odnosu na ranijih 30.000,00 KM, što predstavlja usklađivanje sa realnim troškovima izgradnje i kupovine nekretnina, uzimajući u obzir rast cijena i inflatorna kretanja. Jedna od najznačajnijih unaprjeđenja u Uredbi jeste ukidanje konkursne procedure, čime je postupak pojednostavljen i omogućen kontinuirani prijem zahtjeva tokom cijele godine, što doprinosi većoj dostupnosti prava i efikasnijem rješavanju zahtjeva. Primjena Uredbe u 2025. godini omogućila je pravedniji, fleksibilniji i finansijski realniji sistem stambenog zbrinjavanja, uz zadržavanje i unapređenje dostignutog nivoa prava branilaca i članova njihovih porodica, te stvorila osnov za povećan broj korisnika u narednom periodu.

Uredbom su utvrđeni uslovi, način i postupak ostvarivanja prava na pomoć u rješavanju stambenog pitanja branilaca i članova njihovih porodica koji imaju prebivalište na području Kantona, kao i povratnika u Republiku Srpsku koji ostvaruju osnovna prava iz branilačko-invalidske zaštite u općinama/gradovima Kantona i koji su na evidenciji nadležnog organa za vojne evidencije u općinama/gradovima Kantona.

Budžetom Zeničko-dobojskog kantona za 2025. godinu („Službene novine Zeničko-dobojskog kantona kantona“, broj 25/24) u razdjelu 24, budžetska organizacija 01, potrošačka jedinica 0001 - Ministarstva za boračka pitanja, na poziciji 614200 -"Grantovi pojedincima", subanalitici OAD 208 - „Pomoć u rješavanju stambenog pitanja“ za navedenu namjenu planirana su sredstva, a utrošak navedenih sredstava regulisan je Programom utroška sredstava Budžeta Zeničko-dobojskog kantona za 2025. godinu planiranih na razdjelu Ministarstva za boračka pitanja, namijenjenih za potrebe branilaca i članova njihovih porodica, broj: 02-11-2354/25 od 07.02.2025. godine i broj: 02-11-19716/25 od 31.10.2025. godine.

III. Aktivnosti na realizaciji prava za pomoć u rješavanju stambenog pitanja branilaca i članova njihovih porodica u 2025. god.

Uslovi, način i postupak ostvarivanja prava na pomoć u rješavanju stambenog pitanja branilaca i članova njihovih porodica, utvrđena Zakonom, uređeni su Uredbom kao podzakonskim aktom. Uredba je strukturirana po dijelovima i to: I dio-Opće odredbe, II dio-Postupak dodjele novčanih sredstava, te III dio-Prelazne i završne odredbe, odnosno po dijelovima definisani su korisnici prava, posebni uslovi za ostvarivanje predmetnog prava, način rješavanja stambenog pitanja, prioriteta u stambenom zbrinjavanju, podnošenje zahtjeva, potrebna dokumentacija, kao i ostala pitanja od značaja za pravilno i zakonito provođenje procedure.

Postupak ostvarivanja prava na novčanu pomoć za rješavanje stambenog pitanja započinje podnošenjem zahtjeva nadležnoj gradskoj/općinskoj službi. Gradska/općinska služba putem stručne komisije razmatra zahtjev, vrši uvid u dokumentaciju, stanje objekta na terenu, te Ministarstvu dostavlja obrazloženi prijedlog o odobravanju, odbijanju ili odbacivanju zahtjeva, sa prijedlogom visine sredstava. Komisija Ministarstva provjerava ispravnost postupka i dokumentaciju, po potrebi vrši dodatne provjere ili uviđaj, te ministru dostavlja obrazloženi stav o odbacivanju, odbijanju ili opravdanosti zahtjeva, sa prijedlogom o dodjeli novčane pomoći. O dodjeli sredstava do 5.000,00 KM odlučuje ministar, dok o većim iznosima, na obrazloženi prijedlog Ministarstva, odlučuje Vlada Kantona.

Članom 6. Uredbe definisani su načini rješavanja stambenog pitanja i to:

- a) izgradnja stambenog objekta s ciljem trajnog stambenog rješavanja;
- b) kupovina individualnog stambenog objekta ili stana na osnovu ugovora zaključenog u prethodnoj ili tekućoj kalendarskoj godini;
- c) prilagođavanje stambenog objekta posebnim potrebama ratnih vojnih invalida sa utvrđenim procentom invalidnosti 70% V grupe i više, a što komisija iz člana 13. stav (2) Uredbe cijeni po pojedinačnim zahtjevima;
- d) sufinansiranje izdavanja dozvole za gradnju ili legalizaciju stambenog objekta po rješenjima i računima iz prethodne i tekuće godine i
- e) sufinansiranje troškova priključka na infrastrukturne mreže (voda i kanalizacija, električna energija, gas) na osnovu saglasnosti ovlaštenog organa i računa iz prethodne i tekuće kalendarske godine.

Pored redovnih oblika stambenog zbrinjavanja propisanih Uredbom, sredstva se odobravaju i po posebnim zahtjevima pripadnika branilačke populacije koji nisu izričito obuhvaćeni odredbama Uredbe, a koje, na prijedlog Komisije Ministarstva i uz posebno obrazloženje ministra, odobrava Vlada Zeničko-dobojskog kantona zaključkom. U tom smislu, izuzetno se može odobriti finansijska pomoć za sanaciju i adaptaciju stambenog objekta kada se, na osnovu provedenog postupka i potpune dokumentacije, utvrdi da postojeće stambeno stanje životno i egzistencijalno ugrožava podnosioca zahtjeva i članove njegovog domaćinstva. Postojanje posebnih i specifičnih okolnosti cijeni nadležna gradska/općinska komisija ili komisija Ministarstva, na osnovu dostavljenih dokaza, uključujući zapisnik o izvršenom pregledu stambenog objekta i druge relevantne činjenice, na temelju kojih se nesporno utvrđuje opravdanost odobravanja sredstava. Navedeni način stambenog rješavanja je preciziran članom 18. Uredbe.

Uredbom je predviđena i mogućnost rješavanja stambenog pitanja pripadnika branilačke populacije i kroz pružanje pomoći u svrhu sanacije i adaptacije stambenih jedinica, kao jednog od alternativnih načina stambenog zbrinjavanja, donošenjem Programa, koji na prijedlog Ministarstva donosi Vlada Kantona, u skladu sa raspoloživim budžetskim sredstvima Kantona. Ovaj vid pomoći zamišljen je kao dopunski model podrške, namijenjen unapređenju uslova stanovanja korisnika koji već raspolažu stambenom jedinicom, ali čiji objekti ne ispunjavaju minimalne tehničke i stambene standarde.

U toku 2025. godine, imajući u vidu ukupna budžetska ograničenja, kao i potrebu prioritizacije već uspostavljenih modela stambenog zbrinjavanja, Ministarstvo i Vlada Kantona nisu se opredijelili za donošenje navedenog Programa, te se ovaj oblik pomoći u izvještajnom periodu nije provodio.

Istovremeno, potreba za sanacijom i adaptacijom postojećih stambenih objekata ostaje prepoznata kao značajan segment rješavanja stambenog pitanja branilaca i članova njihovih porodica, te će Ministarstvo u narednom periodu razmatrati mogućnosti za uspostavljanje ovog modela podrške, u skladu sa raspoloživim finansijskim sredstvima i utvrđenim prioritetima socijalne politike.

U toku 2025. godine zaprimljeno je ukupno 472 zahtjeva za stambeno zbrinjavanje, od čega je odobrenih 263 zahtjeva.

U nastavku, u tabeli 1., detaljno je prikazana struktura dodjeljenih pomoći za stambeno zbrinjavanje po gradovima/općinama Kantona prema načinu rješavanja stambenog pitanja.

Tabela 1.- Prikaz odobrenih zahtjeva za stambeno zbrinjavanje u 2025. godini po gradovima/općinama i načinu rješavanja stambenog pitanja

Općina/Grad	Izgradnja	Kupovina	Prilagodavanje	Sufinansiranje izdavanja dozvole za gradnju/legalizacije	Član 18. Uredbe	Sufinansiranje troškova priključka na infostukturalnu mreže	Ukupno novčanih sredstava u KM
BREZA	1	1			1	1	46.500,00
OLOVO			1		2	2	51.083,59
VAREŠ		1				8	22.505,05
KAKANJ	3	1	1	1		4	93.031,45
VISOKO	3	4		1	4	80	281.024,61
ZENICA		3				1	66.500,00
ŽEPČE	1			1	2		52.063,04
ZAVIDOVIĆI	5			1		23	96.486,41
TEŠANJ	1					64	105.572,17
DOBOJ JUG						20	27.125,70
USORA						2	3.000,00
MAGLAJ	1	5		3	2	8	155.098,30
UKUPNO	15	15	2	7	11	213	999.990,32

Prema prikazanim podacima, u izvještajnom periodu odobreno je ukupno 263 zahtjeva za stambeno zbrinjavanje branilaca i članova njihovih porodica, za što je izdvojeno ukupno 999.990,32 KM.

Analizom podataka po jedinicama lokalne samouprave može se zaključiti da je najveći broj odobrenih zahtjeva evidentiran na području Grada Visoko, gdje je odobreno ukupno 92 zahtjeva. Visoko ujedno bilježi i najveći iznos dodijeljenih sredstava, odnosno 281.024,61 KM. Nakon Visokog slijede općine Tešanj sa 65 zahtjeva, Zavidovići sa 29 zahtjeva, Doboj Jug sa 20 zahtjeva te Maglaj sa 19 zahtjeva.

Posmatrano prema načinu rješavanja stambenog pitanja, najveći broj zahtjeva odnosi se na sufinansiranje troškova priključka na infrastrukturnu mrežu, kojih je odobreno ukupno 213. Ovaj podatak ukazuje da je navedeni vid pomoći najzastupljeniji i najpotrebniji korisnicima.

Grad Zenica, iako predstavlja teritorijalno najveću jedinicu lokalne samouprave u Zeničko-dobojskom kantonu, bilježi svega 4 odobrena zahtjeva. Ovakav rezultat značajno odstupa od očekivanog broja zahtjeva s obzirom na broj stanovnika i veličinu grada. Kao jedan od mogućih razloga manjeg broja obrađenih zahtjeva može se navesti smanjen broj uposlenih u nadležnoj službi za boračko-invalidsku zaštitu, što je moglo uticati na pravilno informisanje potencijalnih korisnika, pružanje stručne pomoći pri podnošenju zahtjeva, kao i na ukupnu dinamiku obrade predmeta.

Također, evidentne su značajne razlike između općina i gradova u broju odobrenih zahtjeva, što ukazuje na potrebu jačanja administrativnih kapaciteta nadležnih službi, a u cilju ekspeditivnije dinamike obrade predmeta i kontinuiranog unapređenja informisanja korisnika.

Tabela 2.- Prikaz odobrenih zahtjeva za stambeno zbrinjavanje u 2025. godini po strukturi branilačke populacije

Općina/Grad	DRP/O	RVI	DB	PPB	DPB	PURVI	PUDB	UKUPNO
BREZA		1	3					4
OLOVO		3	2					5
VAREŠ	1		7	1				9
KAKANJ		2	6	1	1			10
VISOKO		6	71	4		1	10	92
ZENICA			2	2				4
ŽEPČE			2				2	4
ZAVIDOVIĆI		3	25	1				29
TEŠANJ		4	55	2			4	65
DOBOJ JUG			14	3			3	20
USORA			2					2
MAGLAJ		1	14	2		1	1	19
UKUPNO	1	20	203	16	1	2	20	263

DRP- dobitnik ratnog priznanja/odlikovanja

RVI- ratni vojni invalid

DB- demobilizirani branilac

PPB- porodica poginulog branioca

DPB- dijete poginulog branioca

PURVI- porodica umrlog ratnog vojnog invalida

PUDB- porodica umrlog demobiliziranog branioca

Analizom strukture korisnika prema kategorijama branilačke populacije može se zaključiti da najveći broj odobrenih zahtjeva pripada kategoriji demobiliziranih branilaca (DB), kojima su odobrena čak 203 zahtjeva, što čini približno 77% svih odobrenih zahtjeva. Ovaj podatak potvrđuje da demobilizirani branioci predstavljaju najbrojniju kategoriju kako pripadnika branilačke populacije, tako i korisnika programa stambenog zbrinjavanja.

Korisnici nezadovoljni stavom Ministarstva imali su, u skladu sa Zakonom o upravnom postupku ("Službene novine FBiH" broj 2/98, 48/99 i 61/22), pravo žalbe na prvostepena rješenja. U dole navedenoj tabeli dajemo prikaz postupanja u žalbenom postupku sa 31.12.2025. godine.

Tabela 3. – Prikaz obrade predmeta u žalbenom postupku sa 31.12.2025. godine


GRAD/OPĆINA	Odbačene žalbe	Odbijene žalbe	Poništena prvostepena rješenja i predmet vraćen na ponovni postupak	Uvažene žalbe	Ukupno predmeta po gradovima/općinama
BREZA		2			2
OLOVO		2			2
VAREŠ					
KAKANJ		2			2
VISOKO		6	2		8
ZENICA		2			2
ŽEPČE		1	1	1	3
ZAVIDOVIĆI		2			2
TEŠANJ		4		1	5
DOBOJ JUG				1	1
USORA		1			1
MAGLAJ		5			5
Ukupno vrsta rješavanja		27	3	3	33

Budžetom Zeničko-dobojskog kantona za 2025. godinu („Službene novine Zeničko-dobojskog kantona kantona“, broj 25/24 i 12/25) u razdjelu 24, budžetska organizacija 01, potrošačka jedinica 0001 - Ministarstva za boračka pitanja, na poziciji 614200 - "Grantovi pojedincima", subanalitici OAD 208 - „Pomoć u rješavanju stambenog pitanja“ za navedenu namjenu planirana su sredstva u iznosu od 1.500.000,00 KM. Odlukom o preraspodjeli rashoda u Budžetu Zeničko-dobojskog kantona broj: 07-03-01-11-71-1-2-1/25 od 28.08.2025. godine budžetska stavka- „Pomoć u rješavanju stambenog pitanja“ je umanjena za 600.000,00 KM, pa su ista na navedenom kontu iznosila 900.000,00 KM. Odlukom o preraspodjeli rashoda u Budžetu Zeničko-dobojskog kantona broj: 07-03-01-11-71-1-2-2-1/25 od 27.11.2025. godine, sredstva su naknadno uvećana za 100.000,00 KM, i ista su iznosila 1.000.000,00 KM.

Od navedenih Budžetom raspoloživih sredstava za ovu namjenu u iznosu od 1.000.000,00 KM ukupno je utrošeno 999.990,38 KM, odnosno 100 % raspoloživih sredstava.

Tabela 4.- Prikaz dodjeljenih novčanih sredstava za stambeno zbrinjavanje po gradovima/općinama Kantona

Općina/Grad	Ukupno novčanih sredstava u KM
BREZA	46.500,00
OLOVO	51.083,59
VAREŠ	22.505,05
KAKANJ	93.031,45
VISOKO	281.024,61
ZENICA	66.500,00
ŽEPČE	52.063,04
ZAVIDOVIĆI	96.486,41
TEŠANJ	105.572,17
DOBOJ JUG	27.125,70
USORA	3.000,00
MAGLAJ	155.098,30
UKUPNO	999.990,32



IV. Zaključna razmatranja

Rješavanje pitanja stambenog zbrinjavanja pripadnika branilačke populacije, kao i aktivnosti koje se kontinuirano provode u tom pravcu, u potpunosti su usklađeni sa reformskim opredjeljenjima Vlade Kantona u oblasti socijalne politike i zaštite prava branilaca i članova njihovih porodica. Navedene mjere imaju za cilj unapređenje ukupnog socijalno-ekonomskog položaja ove posebno osjetljive kategorije stanovništva, uz uvažavanje trajnog moralnog duga države prema onima koji su dali nemjerljiv doprinos u odbrani Bosne i Hercegovine.

Imajući u vidu činjenicu da je značajan broj stanovnika Kantona bio aktivno uključen u Oružane snage Bosne i Hercegovine, te time direktno učestvovao u odbrani zemlje, opravdano je i nužno da država, u okviru svojih realnih mogućnosti, pruža sistemsku podršku u rješavanju njihovih egzistencijalnih pitanja, među kojima stambeno zbrinjavanje zauzima jedno od ključnih mjesta. Izbor modaliteta i obima pomoći uslovljen je ukupnim ekonomskim prilikama u Kantonu, ali se kontinuirano nastoji osigurati pravičnost, transparentnost i dostupnost ove vrste podrške onima kojima je najpotrebnija.

Dosadašnje analize i iskustva iz provedenih prvostepenih i drugostepenih postupaka jasno ukazuju na trend povećanja broja pripadnika branilačke populacije koji se nalaze u stanju socijalne potrebe, te potvrđuju da je ovaj vid pomoći u značajnoj mjeri opravdao svoju svrhu. Smatra se ključnim da se u narednom periodu provode radnje u cilju jačanja institucionalne saradnje i visokog stepena koordinacije između Ministarstva i gradova/općina Kantona, kao ključnih partnera lokalne zajednice u procesu rješavanja stambenih pitanja branilaca i članova njihovih porodica.

Posebno se ističe činjenica da je u proteklom periodu uočen izražen porast potreba za adaptacijom, sanacijom i rekonstrukcijom postojećih stambenih objekata u kojima žive pripadnici branilačke populacije. Slijedom navedenog, opravdano je da se u narednom periodu opredjeljenje Vlade Kantona i Ministarstva dodatno usmjeri ka obezbjeđivanju finansijskih sredstava i za ove oblike rješavanja stambenog pitanja, kako bi se osigurali dostojanstveni i sigurni uslovi stanovanja.

Ministarstvo, kao nadležni kantonalni organ, kontinuirano ulaže značajne napore u unapređenje uslova i kvaliteta života ove populacije, pri čemu se posebna pažnja posvećuje utvrđivanju jasnih prioriteta u oblasti stambenog zbrinjavanja, odnosno rješavanju stambenog pitanja po pravu prvenstva, u skladu sa važećim propisima i principima socijalne pravičnosti.

Broj: 13/04-2-1-37-11109/26
Zenica, 05.06.2026. godine

MINISTAR

Adnan Sirovica